



Ráðhús Reykjavíkur
Borgarráð

Efni: Leyfi Hjallastefnunnar Grunnskóla ehf. til skólastarfs í húsnæði að Skógarhlíð 6 og leyfi til skólastarfs fyrir 6. og 7. bekk

Á fundi skóla- og frístundaráðs þann 19. september 2022 var lögð fram svohljóðandi tillaga skóla- og frístundaráðsfulltrúa Samfylkingarinnar, Framsóknarflokksins og Pírata ásamt minnisblaði sviðsstjóra skóla- og frístundasviðs, dags. 14. september 2022:

Lagt er til að Hjallastefnunni Grunnskólum ehf. verði heimilað skólastarf í nýju húsnæði skólans að Skógarhlíð 6, Reykjavík og að gildistími þjónustusamnings frá 13. maí 2019 vegna 1 til 5. bekkjar, verði framlengdur til 31. desember 2022. Einnig er lagt til að Hjallastefnunni Grunnskólum ehf. verði veitt tímabundið leyfi skólaárið 2022 til 2023 til kennslu í 6. og 7. bekk og að greitt verði framlag vegna nemenda með lögheimili í Reykjavík til samræmis við framangreindan gildistíma þjónustusamnings til 31. desember 2022. Ekki verði gerð breyting á þjónustusamningi um 150 nemenda hámarksfjölda sem heimilt er að greiða framlag vegna. Sviðsstjóra verði falið að gera viðauka við samning aðila, dags. 13. maí 2019, sem kveður á um framangreint sem gildi til 31. desember 2022 og að heimilt sé að greiða framlag vegna allt að 150 nemenda með lögheimili í Reykjavík. Gerður er fyrirvari um að skólahúsnæði uppfylli skilyrði 20. gr., sbr. 43. gr. d. laga um grunnskóla nr. 91/2008, sbr. einnig reglugerð nr. 657/2009, um gerð og búnað grunnskólahúsnæðis og skólalóða, með síðari breytingum og að staðfesting Menntamálastofnunar fái st.

Greinargerð fylgdi.

Tillagan var samþykkt og vísað til borgarráðs. Skóla- og frístundaráðsfulltrúi Vinstri grænna sat hjá.

Tillögunni er hér með vísað til borgarráðs.

Virðingarfyllt

Helgi Grímsson

sviðsstjóri skóla- og frístundasviðs

Hjálagt:

Minnisblað sviðsstjóra, dags. 14. sept. 2022



Reykjavíkurborg



MINNISBLAÐ

Viðtakandi: Skóla- og frístundaráð

Sendandi: Helgi Grímsson, sviðsstjóri skóla- og frístundasviðs

Efni: Umsókn um leyfi til skólastarfs í Barnaskóla Hjallastefnunnar í Reykjavík í Skógarhlíð 6, auk umsóknar um leyfi fyrir skólastarfi á miðstigi, 6. og 7. bekk

I Umsókn Hjallastefnunnar Grunnskólar ehf.

Skóla- og frístundasvið hefur haft til meðferðar umsókn Hjallastefnunnar Grunnskólar ehf., kt. 550119-0210, (hér eftir Hjallastefnan/Barnaskóli Hjallastefnunnar), dags. 9. ágúst 2022, um leyfi til skólastarfs í Barnaskóla Hjallastefnunnar í Reykjavík í húsnæði, að Skógarhlíð 6, Reykjavík, þangað sem allt skólastarf Barnaskólans og leikskólans Öskju flyst við upphaf skólaárs 2022-2023. Jafnframt var óskað eftir að veitt yrði leyfi til kennslu í 6. og 7. bekk skólans skólaárið 2022-2023.

Fram kemur í umsókninni að Hjallastefnan sækir eftir tímabundnu leyfi, til 18 mánaða, frá 1. ágúst 2022 til áramóta 2023/2024. Ráðgert sé að starfsemi Barnaskólans og leikskólans Öskju verði á þeim tíma komin í framtíðarhúsnæði.

Þá segir einnig í umsókn Hjallastefnunnar að nemendur Barnaskólans verði alls 175 og skipting þeirra eftirfarandi eftir árgöngum: 6 ára börn eru 32, 7 ára 36, 8 ára 25, 9 ára 24, 10 ára 23, 11 ára eru 21 og 12 ára 14.

Samkvæmt upplýsingum skólans, dags. 8. september 2022, er ekki óskað eftir að heimilt verði að greiða framlag vegna fleiri nemenda með lögheimili í Reykjavík en heimilt var samkvæmt þjónustusamningi. Samkvæmt þjónustusamningi skóla- og frístundasviðs og Hjallastefnunnar, dags. 13. maí 2019, var heimilt að greiða framlag vegna 150 nemenda að hámarki.

II Upplýsingar varðandi húsnæði grunnskólans

Í umsókn Hjallastefnunnar, dags. 9. ágúst sl. eru veittar eftirfarandi upplýsingar um nýtingu húsakosts að Skógarhlíð 6, Reykjavík:

3. hæð

6 – 7 ára álma (1. – 2. bekkur) - börn fædd 2015-2016

Fermetrar kennslurými = 222,8 m²

sameiginlegt rými 56,4m²

Fermetrar alls = 335,6 m²

Fjöldi barna 65

4. hæð

8 – 12 ára börn 3. – 4. bekkur) – börn fædd 2014-2010

Fermetrar kennslurými = 328,9

sameiginlegt rými = 211,6 m²



Samtals = 540,5 m²

Fjöldi barna 106

III Þjónustusamningur Reykjavíkurborgar og Barnaskóla Hjallastefnunnar Grunnskóla

Skóla- og frístundasvið gerði þann 13. maí 2019 þjónustusamning vegna nemenda í 1. til 4. bekk í Barnaskóla Hjallastefnunnar, *Nauthólsvegi 87, Reykjavík*, við Hjallastefnuna Grunnskólar ehf., kt. 550119-0210. Samningurinn kveður á um að heimilt sé að greiða framlag vegna allt að 150 reykvískra nemenda. Samningurinn tók gildi 10. júní 2019 og gildir til þriggja ára. Með bréfi Menntamálastofnunar, dags. 7. janúar 2020, staðfesti stofnunin framangreindan þjónustusamning sem og önnur gögn er fylgdu umsókn Reykjavíkurborgar um staðfestingu.

Á fundi borgarráðs þann 6. júní 2019 var samþykkt tillaga sem kvað á um að Hjallastefnunni Grunnskólum verði heimilað að hefja kennslu í 5. bekk við Barnaskóla Hjallastefnunnar í Reykjavík frá og með skólaárinu 2019-2020. Með bréfi Menntamálastofnunar, dags. 28. febrúar 2020, staðfesti Menntamálastofnun framangreindan þjónustusamning og að Barnaskóla Hjallastefnunnar í Reykjavík sé heimilt að hefja kennslu í 5. bekk frá og með skólaárinu 2019-2020. Fram kemur að staðfesting sé veitt með vísan í þjónustusamning, dags. 13. maí 2019, sem og önnur gögn, er fylgdu umsókn Reykjavíkurborgar um staðfestingu. Þá kemur fram að staðfesting þessi komi í stað fyrri staðfestingar, dags. 7. janúar 2020.

Á fundi skóla- og frístundaráðs þann 12. janúar 2021 og í borgarráði þann 28. janúar 2021 var samþykkt tillaga sem kveður á um að Hjallastefnunni Grunnskólum ehf. verði veitt leyfi til kennslu þeirra sextán reykvíska nemenda sem þegar voru í 6. og 7. bekk skólans frá samþykktinni til loka skólaársins 2020 – 2021.

Á fundi skóla- og frístundaráðs 9. nóvember 2021 og í borgarráði þann 18. nóvember 2021 var samþykkt tillaga sem kveður á um að Hjallastefnunni Grunnskólum ehf. yrði veitt leyfi til kennslu í 6. og 7. bekk skólans tímabundið skólaárið 2021 til 2022 og að greitt yrði framlag vegna nemenda með lögheimili í Reykjavík í 6. og 7. bekk frá upphafi skólaársins þann 23. ágúst 2021 til loka skólaársins sem yrði þann 8. júní 2022. Heimilt var að greiða framlag vegna allt að 153 nemenda með lögheimili í Reykjavík vegna skólaársins 2021 til 2022.

Á fundi skóla- og frístundaráðs þann 27. júní 2022, var samþykkt tillaga sviðsstjóra skóla- og frístundasviðs um að gildistími þjónustusamninga skóla- og frístundasviðs við sjálfstætt starfandi grunnskóla í Reykjavík yrði framlengdur til 31. desember 2022. Borgarráð samþykkti erindið þann 7. júlí 2022.

IV. Aðrar upplýsingar

Greitt var framlag til Barnaskólans vegna 150 nemanda með lögheimili í Reykjavík þann 1. maí 2022 í 1. til 7. bekk.

Umsögn skólaráðs Barnaskóla Hjallastefnunnar, dags. 8. september 2022, liggur fyrir.

V. Helstu ákvæði grunnskólalaga og reglugerða settum samkvæmt þeim

Í 1. málslíð 1. gr. laga um grunnskóla nr. 91/2009 kemur fram að lögin taka til grunnskóla á vegum sveitarfélaga, til sjálfstætt rekinna grunnskóla og til viðurkennds náms á grunnskólastigi.

Í 3. mgr. 20. gr laga um grunnskóla kemur fram að grunnskólahúsnæði og skólalóðir skuli uppfylla þær kröfur sem gerðar eru í lögum þessum, lögum um vinnuvernd og aðalnámskrá grunnskóla. Húsnæði og allur aðbúnaður skal taka mið af því að tryggja öryggi og vellíðan



nemenda og starfsfólks, svo sem hvað varðar hentugan húsbúnað, hljóðvist, lýsingu og loftræstingu.

Með stoð í framangreindri 20. gr. laga um grunnskóla hefur verið sett reglugerð nr. 657/2009 um gerð og búnað grunnskólahúsnæðis og skólalóða, með síðari breytingum. Þar er í 3. gr. er kveðið á um að húsnæði og skólalóðir skuli uppfylla kröfur laga nr. 91/2008 um grunnskóla, reglugerðar þessarar, aðalnámskrár grunnskóla og laga nr. 46/1980 um aðbúnað, hollustu og öryggi á vinnustöðum. Einnig beri að uppfylla kröfur heilbrigðis- og byggingaryfirvalda til slíkra mannvirkja. Húsnæði, skólalóð og allur aðbúnaður þarf að vera þannig úr garði gerður að unnt sé að ná markmiðum laga um grunnskóla og aðalnámskrá grunnskóla. Er þar sérstaklega átt við að nemendum og starfsfólki skóla sé tryggt öruggt og heilsusamlegt vinnuumhverfi sem skapar öryggi og vellíðan þeirra svo sem varðandi hentugan húsbúnað, hljóðvist og lýsingu, fjölbreytni í náms- og leikaðstöðu og annan búnað.

Skv. 1. mgr. 43. gr. a. laga um grunnskóla nr. 91/2008, með síðari breytingum, skal sveitarfélag sem skóli starfar í gera þjónustusamning um rekstur skólans við rekstraraðila. Samningur felur í sér samþykki sveitarfélags fyrir stofnun skólans, staðfestingu á rétti til fjárframlaga skv. 43. gr. b og skuldbindingu sveitarfélags um að hafa eftirlit með starfi hans. Skv. 3. mgr. 43. gr. a getur sveitarfélag hafnað því að gera þjónustusamning eða takmarkað hann við tiltekinn nemendafjölda, t.d. ef fjárframlög til skólanna kunna að hafa neikvæð áhrif á skólastarf sveitarfélagsins sjálfs og fjárveitingar til þess. Skv. 2. mgr. 43. gr. a. skal Menntamálastofnun staðfesta þjónustusamningin, sbr. einnig 4.- 6. gr. reglugerðar nr. 1150/2018, um sjálfstætt rekna grunnskóla.

Skv. 43. gr. b. laga um grunnskóla nr. 91/2008 með síðari breytingum á sjálfstætt rekinn grunnskóli sem gert hefur þjónustusamning rétt á framlagi úr sveitarsjóði til starfsemi sinnar vegna nemenda sem hafa lögheimili í því sveitarfélagi sem skólinn starfar í. Skal framlagið nema að lágmarki 75% af vagnu meðaltali heildarrekstrarkostnaðar allra grunnskóla sem reknir eru af sveitarfélögum í landinu á hvern nemanda samkvæmt útreikningi Hagstofu Íslands. Gildir þetta hlutfall fyrir skóla með allt að 200 nemendur, en framlagið skal vera að lágmarki 70% fyrir hvern nemanda umfram þann fjölda.

Þá kemur fram í 1. tölulið 1. mgr. 43. gr. d laga um grunnskóla að um rekstur og skólalöng sjálfstætt rekens grunnskóla gildi að starfsemi grunnskólans, þ.m.t. skipulag og kennsluhættir, skuli vera í fullu samræmi við ákvæði laga þessara, reglna sem settar eru á grundvelli þeirra og í samræmi við aðalnámskrá, nema undantekning sé gerð með lögum eða á grundvelli heimildar í lögum.

Í h. lið 2. mgr. 4. gr. reglugerðar nr. 1150/2018 um sjálfstætt rekna grunnskóla kemur fram að staðfest afrit af starfsleyfi heilbrigðiseftirlits sveitarfélags og vottorð bruna- og eldvarnareftirlits á vegum sveitarfélaga og vinnueftirlits þurfi að berast Menntamálastofnun mánuði fyrir áætlaða skólabyrjun.

Í 4. mgr. 6. gr. reglugerðar um sjálfstætt rekna grunnskóla nr. 1150/2018, um sjálfstætt rekna grunnskóla kemur fram að verði skólanum fundið annað húsnæði eða árgöngum fjölgað skul rekstraraðili fyrst leita afstöðu viðkomandi sveitarfélags gagnvart slíkum breytingum sem leitar staðfestingar Menntamálastofnunar.

Þá kemur fram í 2. mgr. 6. gr. reglugerðar um sjálfstætt rekna grunnskóla að sveitarfélög sinni mati og eftirliti með gæðum skólastarfs í sjálfstætt reknum grunnskólum samkvæmt lögum um grunnskóla og hlíta þeir skólar sama eftirliti og grunnskólar sem reknir eru af sveitarfélagi.



VI. Upplýsingar um fjárhagsleg áhrif

Tillaga skóla- og frístundasviðs (SFS) felur ekki í sér fjölgun á hámarksfjölda nemenda sem greitt er fyrir sbr. lið VII hér að neðan. Þar sem tillagan felur ekki í sér fjölgun nemenda hefur hún ekki í för með sér kostnaðarauka fyrir borgarsjóð. Ekki þarf að óska eftir viðauka við fjárhagsáætlun SFS.

VII. Umsögn skóla- og frístundasviðs

Lagt er til að Hjallastefnunni Grunnskólum ehf. verði heimilað skólastarf í nýju húsnæði skólans að Skógarhlíð 6, Reykjavík og að gildistími þjónustusamnings frá 13. maí 2019 vegna 1 til 5. bekkjar verði framlengdur til 31. desember 2022.

Einnig er lagt til að Hjallastefnunni Grunnskólar ehf. verði veitt tímabundið leyfi (haustönn 2022) til kennslu í 6. og 7. bekk og að greitt verði framlag vegna nemenda með lögheimili í Reykjavík til samræmis við framangreindan gildistíma þjónustusamnings til 31. desember 2022.

Ekki verði gerð breyting á þjónustusamningi um 150 nemenda hámarksfjölda sem heimilt er að greiða framlag vegna.

Sviðsstjóra verði falið að gera viðauka við samning aðila, dags. 13. maí 2019, sem kveður á um framangreint sem gildi til 31. desember 2022 og að heimilt sé að greiða framlag vegna allt að 150 nemenda með lögheimili í Reykjavík.

Gerður er fyrirvari um að skólahúsnæði uppfylli skilyrði 20. gr., sbr. 43. gr. d. laga um grunnskóla nr. 91/2008, sbr. einnig reglugerð nr. 657/2009, um gerð og búnað grunnskólahúsnæðis og skólalóða, með síðari breytingum og að staðfesting Menntamálastofnunar fái st.